

Kangerlussuaq ingerlaannartillugu sakkutooqarfimmiit atorneqarnissaanik kissaateqartoqarneranut atatillugu paasissutissat nutaat tunngaviusinnaanersut mittarfeqarfiliornissamut nunallu attaveqaqatigiinnerata ineriartortinnissaanut pilersaarutit allannngortinneqarnissaat eqqarsaasorsorfigineqarsimannginnersoq paaserusullugu apeqquteqaat aallaavigalugu Inatsisartut oqallinnissaannik siunnersuut.
(Partii Naleqqap Inatsisartuni ilaasortaaitai)

Akissuteqaat

(Ineqarnermut Attaveqaqatigiinnermullu Naalakkersuisoq)

Siullermeerneqarnera

Aallarniutigalugu Naalakkersuisuniit apeqquteqaat aallaavigalugu oqallinnissamut siunnersuut pillugu qujavugut.

Apeqquteqaat aallaavigalugu oqallinneq manna aammaloorluni Nuummi aamma Ilulissani nunanit tamalaanit mittarfiit kiisalu Qaqortumi nunap immikkoortuani mittarfiup sananeqarnissaannut, ingerlanneqarnissaannut aningaasalersorneqarnissaannullu killiliussatut piunasaqaatit pillugit Inatsisartut inatsisaanni nr. 4-mi, 22. november 2018-imeersumi tunngavigineqartunik eqikkaanissamut periarfissiivoq.

Partii Naleqqap Inatsisartuni ilaasortaaitaanit kissaatigineqarpoq, mittarfiliortiternermut aningaasaliisoqassanersoq isumaliutigeqqinneqassasoq.

Inatsisartut sanaartornermut inatsimmut aalajangiinissaannut, taamaalillunilu Ilulissani Nuummilu Imarpik qulaallugu mittarfinnik kiisalu Qaqortumi nunap immikkoortuani mittarfimmik sananissaq sioqqullugu piffissangaatsiaq misissueqqaarnermut atorneqarpoq. Ilaatigut inuiaqatigiinni, ingerlatsinermi missingersuuteqarnermilu aningaasaqarnermik misissueqqissaarnerit annertuut, mittarfiliortiternissat ilumut aningaasaliiffiulluarnersut qulakkeerniarlugu tapersiisussat suliarineqarput.

Tassalu aningaasaqarnermik misissueqqissaarnerit taakku mittarfinnut nutaanut aningaasaliinitsigut isertitassanik sipaagassanillu arlalinnik tikkuussipput. Isertitat taakku takornariaqarnerup annertusinerani inuussutissarsiornermilu ineriartortitsinermi inuiaqatigiinnut siuariartitseqataassapput. Taamatutaaq mittarfiit pisortat aningaasaliissutaanni taamatullu angalasut ataasiakkaat akikinnerusunik bilitseqalernerisigut, pitsaanerusumillu angalariaaseqalernerisigut, sipaagassanik arlalissuarnik angusaqarnissamut pisooqataassapput. Taamaattumik mittarfiliortiternerit Nuuk aamma Ilulissat minillugit, Kalaallit Nunaata sinnera pilliutigalugu sanaartorneqarnerinik oqartoqarneranut Naalakkersuisut isumaqataannngillat – akerlianik pisoqarmat. Mittarfiliortiternerit nuna tamakkerlugu annertusaaqataassapput ineriartortitseqataassallutillu.

Naalagaaffiup mittarfiliortiternermut aningaasalersueqataanissaa pillugu isumaqatigiissuteqarnerup kingunerisaanik, Inatsisartut sanaartornermut inatsimmut akuersinerannut ilanngullugu, mittarfiliortiternermi aningaasaqarneq inuiaqatigiillu aningaasaqarnerannut sunniutissat oqallisigilluarneqareerput suliarineqareerlutillu.

Illersornissaqarfiup Kalaallit Nunaanni mittarfiit ilusiligaanerannut soqutiginninnerannut tunngatillugu Naalakkersuisuniit taamaallaat oqaatigineqarsinnaavoq, illersornissaqarfiup soqutiginninnera ataatsimut isigalugu ilaasut angalasarnerannut misissueqqissaarnerit, inuiaqatigiit aningaasaqarnerannut kingunerisassanik misissueqqissaarnermut tunngavigineqartut inernerinik nikisitsinissaat naatsorsuutigineqanngimmat. Illersornissaqarfiup immikkulluunniit soqutigisaqartut allat mittarfinnik aalajangersimasunik atuinissamik soqutiginnippata, taamatut soqutiginninnerup akuerineqarsinnaaneranut piunasaqaatit qanoq ittuussanersut suussanersullu naliliiffigineqarumaarpoq.

Tamatumunnga atatillugu erseqqissaatigineqassaaq, mittarfinnut pingasunut nutaanut inatsimmut aalajangiinissamut tunngaviusut Illersornissaqarfiup Kangerlussuarmik atuiinnarsinnaanerannik mattussinngimmata.

Taamatut oqaaseqarluta Naalakkersuisuniit Inatsisartuni oqallinnissamut qilanaarpugut.